

UNIVERZITET U SARAJEVU
- SENAT -

Broj: 0101-I-1349/08

Sarajevo, 07. 05. 2008. godine

Z A P I S N I K
SA TEMATSKE SJEDNICE SENATA
ODRŽANE 07. 05. 2008. GODINE

Prisutni članovi Senata: Prof. dr. Faruk Čaklovica, rektor, prof. dr. Samir Arnautović, prof. dr. Veljko Trivun i prof. dr. Slavenka Vobornik, prorektori, članovi Senata sa visokoškolskih ustanova: prof. Zijad Mehić, prof. dr. Ahmet Hadrović, prof. dr. Muris Čičić, prof. dr. Kemo Sokolija, prof. dr. Adnan Silajdžić, prof. dr. Ramo Masleša, prof. dr. Mirko Pejanović, prof. dr. Izet Rađo, prof. dr. Samir Čaušević, prof. dr. Faruk Dalagija, prof. dr. Elvira Kovač-Bešović, prof. dr. Srebren Dizdar, prof. dr. Munib Maglajlić, prof. dr. Muhamed Zlatar, prof. dr. Ejub Džaferović, prof. dr. Bakir Mehić, prof. dr. Ivan Čavlović, prof. dr. Uzeir Bavčić, prof. dr. Mirsad Kurtović, prof. dr. Mustafa Imamović, prof. dr. Kenan Suruliz (po ovlaštenju Dekana), prof. dr. Rifat Škrijelj, prof. dr. Merzuk Cacan, prof. dr. Hajrija Konjhodžić-Raščić, prof. dr. Faruk Mekić i prof. dr. Abdulah Gagić (po ovlaštenju Dekana), te prof. dr. Faris Gavrankapetanović (KCU) i Haris Hasanspahić, predsjednik Studentskog parlamenta.

Ostali prisutni: Prof. dr. Sead Redžepagić, predsjednik Upravnog odbora Univerziteta u Sarajevu, prof. dr. Azra Kozarčanin, član Parlamenta Kantona Sarajevo i Zoran Selesković, dipl.iuris, generalni sekretar.

Odsutni: Prof. Nusret Pašić, prof. dr. Hašim Muminović i dr. Ismet Ovčina (NUB), članovi Senata.

Zasjedanje je počelo u 13,00 sati.

Predsjedavao je prof. dr. Faruk Čaklovica.

Razmatran je slijedeći

D N E V N I R E D:

- 1. Rasprava o predloženom tekstu Nacrta zakona o visokom obrazovanju Kantona Sarajevo.**

TOK SJEDNICE:

Prof. dr. Faruka Čaklovića je dao uvodne napomene povodom provedene rasprave na visokoškolskim ustanovama o predloženom tekstu Nacrta zakona o visokom obrazovanju Kantona Sarajevo, te upoznao prisutne o dinamici rada grupacija visokoškolskih i naučnih članica Univerziteta u Sarajevu na tekstu Nacrta zakona o visokom obrazovanju Kantona Sarajevo. Ovom prilikom je istakao da su visokoškolske ustanove na tekstu Nacrta zakona radile vrlo temeljito, te da su sve primjedbe, sa konkretnim prijedlozima, dostavljene svim članovima Senata.

Zatim je gospodin Zoran Selesković pročitao pripremljeni prijedlog zajedničkih zaključaka/primjedbi Senata Univerziteta u Sarajevu na predloženi Nacrt zakona o visokom obrazovanju Kantona Sarajevo kako slijedi:

Senat Univerziteta u Sarajevu nakon provedene javne rasprave na svim visokoškolskim ustanovama Univerziteta u Sarajevu, sumirajući sve primjedbe, donio je slijedeće zaključke, koji predstavljaju zajednički stav Senata Univerziteta na Nacrt zakona o visokom obrazovanju Kantona Sarajevo:

1. Neprovodivo je da se Univerzitet u Sarajevu integriše u izuzetno kratkom roku koji je dat u prelaznim i završnim odredbama Nacrta zakona (dio četrnaesti), te se predlaže da se ostavi optimalan period, ne kraći od dvije godine, u kojem bi se sačinila „STUDIJA IZVODLJIVOSTI INTEGRACIJE UNIVERZITETA U SARAJEVU“, nakon čega bi Univerzitet zajedno sa Vladom Kantona Sarajevo ocijenio postojanje uslova za njenu provodivost (finansijsku i institucionalnu), uvažavajući potrebe organizacije institucije i nastavnonaučnog i umjetničkog procesa na Univerzitetu u skladu sa principima Bolonjskog procesa. Integracija Univerziteta je zacrtana Okvirnim zakonom o visokom obrazovanju i proces je koji nije moguće negirati, ali je proces koji traži ozbiljne organizacione pripreme i značajne resurse koji bi omogućili da integrisani Univerzitet preuzme i integrisane funkcije od visokoškolskih ustanova;
2. Cjelokupna procedura donošenja, odnosno usklađivanja novog Zakona o visokom obrazovanju Kantona Sarajevo sa Okvirnim zakonom o visokom obrazovanju u BiH je u kašnjenju i prekoračeni su utvrđeni rokovi. U tom smislu predlažemo da se automatizmom produže rokovi određeni za sprovođenje javne rasprave o Nacrtu zakona, odnosno da predlagač Nacrta zakona ima u vidu da je dat ogroman broj amandmanskih primjedbi, što bi trebalo detaljno razmotriti i uvažiti (U prilogu: primjedbe članica i pridruženih članica Univerziteta u Sarajevu);
3. Nacrt zakona ne obezbjeđuje dovoljnu akademsku, upravljačku i finansijsku autonomiju Univerziteta u Sarajevu, te u tom smislu nije u duhu određenih odredaba Okvirnog zakona o visokom obrazovanju u BiH (član 19);
4. Uspostavljanje Savjeta za visoko obrazovanje od strane institucija države (Poglavlje II Nacrta zakona), koje predviđa članstvo resornog ministra i njegovog saradnika u istom tijelu, nije prihvatljivo rješenje jer nosi elemente „političkog miješanja“ u poslove akademske zajednice, što je direktno u suprotnosti sa definicijom akademske autonomije (član 5. Nacrta zakona);

5. Neprihvatljivo je da Nacrt zakona predviđa mogućnost finansiranja iz budžetskih sredstava visokoškolskih ustanova koje nisu javne ustanove, osim ako iste nisu u sastavu neke od javnih visokoškolskih ustanova, jer se javne visokoškolske ustanove samo djelomično finansiraju iz budžeta Kantona Sarajevo, što ukazuje da ukupan budžet za visoko obrazovanje nije dovoljan, te da nema dodatnih sredstava za finansiranje visokoškolskih ustanova koje nisu javne ustanove. Neprihvatljivo je da javne visokoškolske ustanove ne mogu samostalno raspolagati vlastitim prihodima, što je suprotno odredbama Okvirnog zakona o visokom obrazovanju u BiH (član 19);
6. Predlagač Nacrta zakona mora uzeti u obzir potrebu prethodnog usaglašavanja legislative od državnog do kantonalnog nivoa, pri čemu nova organizacija integrisanog Univerziteta, ne smije biti prepreka za nesmetan rad organizacionim jedinicama u sklopu fakulteta i akademija Univerziteta u Sarajevu (zavodi, instituti, klinike, laboratorije i sl.) koje obavljaju specifične vannastavne aktivnosti;
7. Nacrt zakona u nekim svojim odredbama ugrožava ljudska prava nastavnika i saradnika visokoškolskih ustanova Univerziteta u Sarajevu, što je neprihvatljivo (član 93.);
8. Nacrt zakona u članu 88. (stav 5, 6, 7, 8 i 9) definiše određena prava i obaveze po pitanju akademskog izbora redovnog profesora, koja su u potpunosti nepoznata u evropskom akademskom prostoru i kao takva su neprihvatljiva;
9. Neprihvatljiva su rješenja u Nacrtu zakona (član 102.-115.) koja se odnose na tijela visokoškolskih ustanova i tijela organizacionih jedinica (rukovođenje, prava i obaveze, imenovanje i razrješenje menadžmenta akademija, fakulteta i Univerziteta, nadležnosti tijela organizacionih jedinica, itd..) u kojem su određene nepripadajuće nadležnosti date stručnim, a ne organima upravljanja, što je u suprotnosti sa odredbama Okvirnog zakona o visokom obrazovanju u BiH;
10. U Nacrtu zakona nedovoljno, odnosno uopće nisu tretirane, a niti definisane specifičnosti pojedinih grupacija visokoškolskih i naučnih članica Univerziteta u Sarajevu i studijskih programa koje iste realiziraju;
11. Imajući u vidu izuzetan značaj ovog Zakona, koji predviđa najzahtjevniju reformu u historiji Univerziteta u Sarajevu, pri čemu treba voditi računa da ponuđena rješenja i rokovi moraju biti realno provodivi u praksi, Senat Univerziteta u Sarajevu stoji, u svom punom kapacitetu, na raspolaganju Predlagaču u daljem radu na tekstu ovog Zakona. Smatramo da Kanton Sarajevo i Univerzitet u Sarajevu imaju zajednički cilj, a to je donošenje kvalitetnih, modernih i provodljivijih zakonskih rješenja, koja će omogućiti da Univerzitet u Sarajevu i visoko obrazovanje na području Kantona Sarajevo postanu priznat dio evropskog akademskog prostora.

Zatim je otvorena kraća diskusija u kojoj su učestvovali: prof. dr. Ejub Džaferović, prof. dr. Muhamed Zlatar, prof. dr. Srebren Dizdar i prof. dr. Mirko Pejanović.

Nakon okončane diskusije članovi Senata su podržali zajedničke zaključake/primjedbe Senata Univerziteta u Sarajevu na predloženi Nacrt zakona o visokom obrazovanju Kantona Sarajevo.

Sjednica je završena u 13,35 sati.

REKTOR

Prof. dr. Faruk Čaklovica

Zapisnik:

Alma Voloder-Madacki